


宁德支提寺志选



宁德县志办公室编印



鑲金大毗盧銅佛像

金剛山從昔已來諸菩薩衆於中止住
現有菩薩名曰法起與其眷屬諸菩薩
衆千二百人俱常在其中而演說法東
南方有處名支提山從昔已來諸菩薩
衆於中止住現有菩薩名曰天冠與其
眷屬諸菩薩衆一千人俱常在其中而
演說法西南方有處名光明山從昔已
來諸菩薩衆於中止住現有菩薩名曰
賢勝與其眷屬諸菩薩衆三千人俱常
在其中而演說法西北方有處名香風

目 录

支提寺志序	1—6
汪大润撰	1
释普现撰	3
李勋煌撰	5
支提山	7—26
峰、岩、台、坛、洞、林、壑、岭、 池、潭、湖、洲、井、泉、石。	
支提山记（僧显求）	27—29
支提寺始末记（陈鸣鹤）	30—34
支提山纂修志序（陈璜）	35—36
洞天外史序（黄凤翔）	37—39

传.....40—44

元表法师 开山了悟禅师
中兴大迁和尚

诗.....45—68

七言古体 七言律诗 七言绝句

逸事.....69—70

越王紫袍 怪石和尚 断碑古篆
重装龙藏 广植杉木

后记.....71

插图

摄影王和康

封面：支提寺山门

摄影陈声扬

支提寺志序

方輿記載之典，所以志其山川、人物、道里、形勝；而凡郡邑之內，名山大川，為仙釋栖真之所，騷人墨士攬勝留連之地，又各自為記載，以傳之于後。凡以敷揚靈淑，鼓吹休明而已。方今海宇乂安，文教日興，上帝史館諸臣，纂修一統志，行且次第告成，誠盛典也；則凡名山之有志，豈容已乎？寧陽處閩海一隅，邑有支提山寺在霍童之右，表然居三十六洞天之首。又嘗翻閱內典《華嚴經》載：東南方有山名曰支提，有天冠菩薩與其眷屬一千人常住說法，則支提寺為菩薩道場。不徒祖師法席，宜其俯視法苑，橫絕震旦也。余視事之明季，歲甲戌，因尋九十九峰遺迹，履嶮岩，披蒙茸，覺耳目所至都非恒境，洵為洞府仙都，香界佛地。噫嘻！觀止已！蓋山寺自有唐開基，歷宋、元、明以來，迢迢千余年，雖中更廢興，

而地灵益显，岂非天神呵护，历久不磨者耶？寺故有志以类而分，是故于峰岩、洞壑、林岭、泉石，而知天台雁宕未足称奇也；于殿阁、门楼、亭桥、宫观，而知雄伟奇丽，以时修举也；于吟咏诗文，仙释逸事，而得山川性情之乐，为绝尘超世之观也。使阙焉不修，修矣而不付之剞劂锓布传后，寻复散乱淹没，将欲使后之人追了悟之遗踪，振狮弦之绝响，而邈不可得，深为可惜。宁独翰墨失纪，无能为山川生色已哉！住僧济明，从事数年，方将卒業于此，而问序于余，余因略书数语于端，庶几梨枣告成，以补郡邑纪载所未逮，藏之名山，为馆阁著述之副。他年征书采择有必及，亦官斯土者之幸也。且令博学好古之士，披览之下，虽蜡屐未至，足供卧游。兹山虽僻处海峤，而天冠名氏，烈烈人间，于是书也不重有赖乎？如徒曰山寺之志，而无关纪载之盛，是非余之所知已。

时康熙甲戌岁蒲月，文林郎，知宁德县事、知县汪大润、存庵，甫题于白鹤署中。

支提寺志序

尝阅佛《华严经》，如来放大光明，照一世界，而过百千万亿世界；普贤从三昧起说，一香水海以及无量无边香水海。非仅示法界之庄严，显神通之广大已也，实欲廓人心本有之光明，使其悟世界因缘之成就。故有刹土则有佛现身；有名山则有菩萨说法。如支提山在东南方，有天冠菩萨与其眷属一千人，俱常在其中而演说法。此《华严经》中之所宣说，即支提志之本起也。厥后心王菩萨指出，东震旦国有山名曰“支提”，又为志书下注脚矣。从此龙王舍地，法师传华严之经；白猿引道，相国栖化成之寺。胜缘既起，尘界斯兴，重荷敕建梵宫，前曰“华严”，而后曰“华藏”。两番赐铸圣像，过去千尊而现在千尊。说法有台，晒衣有石，圣迹犹存。天钟常鸣，天灯常灿。灵踪非一代有圣僧阐化，所以福地常兴。兼之真人所居，允

称洞天第一。但山川气运不无盛衰，若菩萨道场岂关兴废。考自唐、宋而元、而明，再经毁废，都缘劫运而变更，三度兴隆，皆荷天恩之浩荡，宁非佛境有此奇缘。于是学士先生，或命驾而登临，或呼朋而瞩览。高僧衲子，或策杖而随喜，或飞锡而卓庵。游山有记，灵岩秘洞无纸墨文字以卷舒；即景赋诗，逸思高怀同水石烟云而缥缈。然而篇章散漫，是用编修；景物错综，必资谱叙。济明禅士者，性质聪慧，意气高闲，从幼脱白此山，觉地幽深，披寻殆尽，间常陪随佳客名人题吟，领略亦多，乃与二三法侣，編集旧志而增补之。若修葺，若纂修，若编辑，若裁定，一依先辈纂成。若山、若寺、若释、若佛、若诗文、若逸事，既凭旧章。编定将付之梓，丐序于余，盖欲指点九十九峰幽奇，遍现三千大千沙界。余思历朝成典，首于封祀，名山一统，輿图收尽。蒞隅梵刹。龙藏常颁于兰若，宸恩时下于翠微。诚以不二法门，阴翊王化；十方觉苑，普福群生。故知世界中不可无佛刹，则名山巨刹

似不可以无志也。昔人听酒楼歌曲而知然，闻小儿诵诗而顿悟。倘缘披阅斯志于山水文章中，见天冠面目，则知殿阁林峦，总在华藏性海，而一一香水海，无非自己光明，然后笔尖头上，短赋长篇，眼耳根中，溪声山色，皆是法音宣流，宁特一时、一方、一刹土而已耶？因不辞鄙拙而为之序。

康熙甲戌荔月，草庵释普现题于龙潭精舍。

支提寺志序

霍童为三十六洞天之冠，其右有寺曰支提。霍童以仙著，支提以佛灵，而支提之名独著。盖自有唐迄今千余年，得以历劫不磨，而为神灵所呵护者亦已久矣。寺距宁德县治北八十里，其东距古田杉洋乡七十里。辛未秋，余以事经杉洋，旋北折至宁德诸乡，向其父老土人，询霍童支提之胜，多未至其地而能言遗迹者。乡居常务农，闲以其力出贸易，权子母，

习俗固然无足怪，而以予风尘奔走，名胜即在咫尺地，竟无山水缘，自问良亦俗矣。其年夏，余在省奉檄将赴浙，其乡人来告余曰：支提旧志，简乘多脱落，兹公议募而重修之，请为序以纪。余欣然曰：里俗之衰，不有君子何以持其后。乡人计蝇头利，每年终则罄其私囊之所赢，买田宅以为子孙计，风雅之事无过而问者。今诸子独能起而返之，既异俚俗意而垂忧胜迹之淹继，起名公之吟作，历久而终息也。慨然图修之，余何爱不为之记？若夫旧志，则为吾乡在杭、兆客诸先正手修。凡其洞壑、林泉、殿阁、亭桥诸境，吟咏诗文逸事之全，志备载之，予奚赘一词？倘他日者，返故乡重临宁阳，寻天冠之面目，九十九峰之遗迹，亦于是志有赖焉。斯举也，倡募者为古田杉洋李大钊，宁德霍童缪长焕，兴贤宋佻藩、陈奇瑞，并本寺住僧悟波而已。例得而类志之。时同治十一年六月，五品衔浙江即用知县李勋煌题于省之荔水山庄。

支 提 山

距宁德县城北四十里为铜镜，由铜镜北循二十里抵扶摇，自扶摇五里右折度邑岭，又五里至霍童村，转南里许是为小支提寺，支提之下院也。从小支登霍童岭十里，石磴千盘松篁夹道，右连大小童峰，左接紫芝静室岭，即白猿前导之处。立绝顶俯视群峰皆膝下儿孙矣。越紫芝室五里至第三岭，灌木丛森映蔽天日，直下千层。右转葭池亭里许至钓月桥，度桥百余武①至山门，复数武抵寺。寺平开一窟，环绕群峰，状如千叶莲花，而寺在其心焉。按《华严经·菩萨住处品》②云：东南方有山名曰支提，现有天冠菩萨与其眷属一千人俱常住说法。《翻译名义》云：梵语支提，此翻可供养处。《杂心论》云：有舍利③名塔，无舍利名支提。文句云：支提无骨身者也。阿舍明四支徵谓：佛生处、得道处、转法轮处、入灭处。按此则支

提为菩萨转大法轮之所洵足徵矣。昔唐元表负经延窟，宋了悟寻迹化林，肇为开山之祖，继有辨隆禅师大演宗乘，宏开觉路，于是天冠面目昭灼于人间矣。溯来龙自华顶峰发脉，度华严岭十余里，迢递顿伏，突起两峰秀出云表，宛如双髻，实寺之主山。望前一峰，圆秀而小，状如钵盂，为寺内案。由双髻东北七里许，开展大嶂曰“来悟峰”。望东下“法华峰”，为寺左嶂。折南曰“宝盖峰”，复循为“锦屏峰”，即寺之外案。旁耸一峰，势若凌空，天灯常现其顶，是为“金灯峰”。西南之角平展一嶂，高接云霄，曰“报雨峰”。折而西，涌腾挺柱，屹立端重，为“吉祥峰”。连于帝释、绛节、天柱三峰，为寺右障。是山也高二十余里延袤五十里，多茂林修竹，深谷寒岩。远近罗列凡九十九峰，绵亘幽深，人迹莫到。杖屨所及者，四十有八峰。诚禅门之法苑，震旦之佛窟也。自唐迄今千有余载，虽代有废兴，法无隆替。万历元年，大迁和尚名闻上国，德重中宫，奉敕住山，重兴梵宇，开宗唱导，遐尔趋

风。追了悟之遺踪，振獅弦之絕响，光揚祖道，垂蔭檀林。茲山實寓內名勝之巨區云。

注释：

①武，半步为武。

②品，佛经中的章节。

③舍利，和尚的骸骨称舍利。

峰

双髻峰，一名玉髻，两峰对峙，高出云表，寺之主山。

钵盂峰，山秀而圆，在山门前。

锦屏峰，寺之外案，联于宝盖。

金灯峰，夜深常有天灯起于林间，初升如斗，渐高渐大，至若车轮。照耀山谷，不异白昼。倏起倏灭，勿有勿无。又名放光峰，联于锦屏。

报雨峰，在金灯右。每天晴霁，峰起云雾，风雨倏至。

来悟峰，在寺东北七里许。昔玄本禅师睹此悟道，因名。

天柱峰，在寺右。巨丽雄标，为双髻之表。

绛节峰，群峰螺集，连于天柱。

大童峰，距寺东北十里。峭壁凌空，多产松桧、毛竹。顶有仙迹、丹灶、药臼、石钵盂、玉镜碧色皆天然也。峰畔有石棋盘，面径数尺，旁两石，俨对坐焉。左侧石障平开一幅，常靄紫气，曰“云屏”。

小童峰，连于大童峰，高亚之，傍有仙井，泉极甘冽。

紫芝峰，宋大中祥符间，产紫芝一十五本，高丈许。在童峰之南。

左弼峰，在童峰左，按《仙经》云，茅君为左弼仙卿。

右弼峰，在童峰右，按《仙经》云，韩众为右弼仙伯。

卓锡峰，在寺西北二里许。

紫微峰，在寺西北三里许。

帝释峰，在寺右一里许。

幢幡峰，在寺东二里许。

吉祥峰，在寺西一里许。

贵人峰，在锦屏左。

挂月峰，去寺西南五里许。

普贤峰，距寺西十里，即天峰也。

维摩峰，在说法台前。

华顶峰，峰最高，可以瞰海，多产纹石。

本大寺发脉处也。

毛女峰，平梳两髻，俨如毛女状。在笔架左。

合掌峰，在霍童西。两峰倚峙如合掌状。

九仙峰，唐高僧本净尝居此。清宵，有九人寄宿净纳诸庵中，昧旦，化鹤唳空而去。在霍童东①。

慧日峰，去寺二十里，即慧日庵之外案。尖锐青霄，日出当其顶，旧志有“海门日出慧山红”之句。

菩萨峰，状如大士跏趺于狮子之背。在合

掌左。

金峰，在霍童西北三里许。时有神灯夜现，顶构小庵，俗呼“茅师庐”，供大悲圣像。后有石盘出圣水，色若乳。久旱，乡人虔祷，水出雨辄应。

展诰峰，平突而秀，宛如展诰。在金峰左。

石牛峰，距寺北五里许。

羊樛峰，峰多白石，如群羊出入状。在石牛左。

高盖峰，峰上可观潮汐，峰畔有洞，即霍林洞之别户也。一名天岩，距寺东十里许，邑志谓高山盖是也。

玉女峰，在紫芝右。俯瞰清流，孤标挺立，极烟云窈窕之态。

法华峰，宋昭爱禅师，于此诵《法华经》至《穷子喻品》得悟因名。距寺东三里许。

卓笔峰，青靄尖锐，高插云霄。去寺东十里。

宝盖峰，即南峰。去寺三里。

莲萼峰，在寺西北五里许。